

**BOSNA I HERCEGOVINA**  
**Konkurencijsko vijeće**



**БОСНА И ХЕРЦЕГОВИНА**  
**Конкурентијски савјет**

**ODLUKA**  
**o proceduri oslobađanja odnosno ublažavanja od kazne (liniency policy)**

**Sarajevo**  
**Mart 2010. godine**



Na osnovu člana 25. stav (1) tačka a) i člana 54. stav (4) Zakona o konkurenciji («Službeni glasnik BiH», broj 48/05, 76/07 i 80/09), Konkurencijsko vijeće na 104. sjednici održanoj dana 23.03.2010. godine je donijelo

**ODLUKU**  
**o proceduri oslobađanja odnosno ublažavanja od kazne (liniency policy)**

**I OPŠTE ODREDBE**

**Član 1.**

(1) Ovom Odlukom se utvrđuje procedura oslobađanja odnosno ublažavanja od kazne u slučajevima kada privredni subjekt učestvuje u sporazumu iz člana 4. stav (1) Zakona o konkurenciji i uslovi za oslobađanje odnosno za ublažavanje od kazni.

(2) Ova Odluka se primjenjuje na privredne subjekte iz člana 2. Zakona o konkurenciji koji ostvare dobrovoljnu saradnju sa Konkurencijskim vijećem i dostave dokaze koji su bitni za donošenje odluke o povredi odredbi člana 4. stav (1) Zakona o konkurenciji.

**II OSLOBAĐANJE OD KAZNE**

**Član 2.**

(1) Konkurencijsko vijeće može osloboditi privredni subjekt od kazne, koja bi se inače mogla izreći istom, ako prvi dobrovoljno dostavi dokaze o sporazumu iz člana 4. stav (1) Zakona o konkurenciji, do tada nepoznate Konkurencijskom vijeću, a koji omogućuju donošenje zaključka o pokretanju postupka u vezi sa zabranjenim sporazumom.

(2) Oslobađanje od kazne iz stava (1) ovog člana će se odobriti pod uslovom da Konkurencijsko vijeće u vrijeme prijave za oslobađanje od kazne nije imalo dovoljno dokaza da donese Zaključak o pokretanju postupka u smislu člana 4. stav (1) Zakona o konkurenciji u vezi sa zabranjenim sporazumom.

**Član 3.**

(1) Privredni subjekt, podnosilac prijave za oslobađanje od kazne, u momentu podnošenja prijave Konkurencijskom vijeću, mora ispuniti sljedeće uslove:

- a) obustaviti sva svoja djelovanja koja se odnose na pretpostavljeno kršenje člana 4. stav (1) Zakona o konkurenciji najkasnije do trenutka podnošenja prijave za oslobađanje od kazne,
- b) ne smije obavijestiti ostale učesnike predmetnog sporazuma o svojoj prijavi za oslobađanje od kazne,
- c) mora saradivati kontinuirano i efikasno tokom cijeloga postupka i osigurati potpuno, istinito i iskreno dostavljanje Konkurencijskom vijeću dokaza i informacija koje posjeduje ili su pod njegovim nadzorom, a uključujući sve oblike podataka, odnosno dostaviti dovoljno dokaza koji se odnose na pretpostavljeno kršenje člana 4. stav (1) Zakona o konkurenciji, i

d) ni na koji način navoditi druge privredne subjekte da učestvuju u zabranjenom sporazumu.

(2) Pod prijavom za oslobađanje od kazne iz ovog člana podrazumijeva se svaki kontakt, usmeno ili pismeno ili elektronski, sa Konkurencijskim vijećem.

#### Član 4.

(1) Ukoliko prvi privredni subjekt, podnositelj prijave za oslobađanje od kazne, u istom predmetu, ne uspije udovoljiti uslovima iz člana 3. ove Odluke, prvi sljedeći privredni subjekt podnositelj prijave za oslobađanje od kazne koji ispuni uslove iz člana 2. i 3. ove Odluke biće razmatran u proceduri za oslobađanje od kazne.

(2) Konkurencijsko vijeće neće uzeti u obzir prijavu drugog privrednog subjekta za oslobađanje od kazne, u istom predmetu, dok ne donese odluku o prijavi prvog privrednog subjekta za oslobađanje od kazne.

### III PROCEDURA OSLOBAĐANJA OD KAZNE

#### Član 5.

Privredni subjekt podnositelj prijave za oslobađanje od kazne mora okvirno predstaviti činjenice za slučaj Konkurencijskog vijeća. U početnoj fazi privredni subjekt može se služiti uopštenim podacima da bi zaštitio svoju anonimnost.

#### Član 6.

Ukoliko u prvom kontaktu Konkurencijsko vijeće zaključi da uslovi iz člana 2. i 3. ove Odluke nisu ispunjeni, privredni subjekt zainteresovan za oslobađanje biće odmah informisan da ne postoji mogućnost oslobađanja od kazne za navedeni slučaj.

#### Član 7.

Zajednička prijava za oslobađanje od kazne dva ili više privrednih subjekata neće se uzimati u razmatranje.

#### Član 8.

Ako Konkurencijsko vijeće odluči da privredni subjekt zainteresovan za oslobađanje od kazne ispunjava uslove iz člana 3. ove Odluke i želi da nastavi saradnju obavezno dostavljajući ubuduće sve informacije o navodnom kršenju koje posjeduje i opis nelegalnih radnji, Konkurencijsko vijeće će na osnovu dostavljenih informacija i opisa nelegalnog djelovanja, donijeti odluku o uslovnom oslobađanju od kazne.

#### Član 9.

(1) Po prijemu odluke o uslovnom oslobađanju od kazne, privredni subjekt dužan je informisati Konkurencijsko vijeće o svim dokazima sa kojima raspolaže.

(2) Konkurencijsko vijeće ne može dokaze iz stav (1) ovoga člana upotrebiti protiv privrednog subjekta podnosioca prijave za oslobađanje od kazne.

#### Član 10.

(1) U slučaju ako Konkurencijsko vijeće ne donese odluku o uslovnom oslobađanju od kazne,

privredni subjekt podnosilac prijave za oslobađanje od kazne može povući sve dostavljene dokaze za oslobađanje od kazne ili zatražiti da se prijava za oslobađanje od kazne može smatrati zahtjevom za ublažavanje kazne.

(2) Konkurencijsko vijeće ne može koristiti informacije dobijene u postupku oslobađanja od kazne ukoliko ih je privredni subjekt povukao u skladu sa stavom (1) ovoga člana.

(3) Povlačenje informacija koje je privredni subjekt dostavio u skladu sa stavom (1) ovog člana ne sprečava Konkurencijsko vijeće da iskoristi uobičajene nadležnosti za istragu kako bi došlo do tih informacija.

#### Član 11.

Privrednom subjektu podnosiocu prijave za oslobađanje od kazne, koji je dobio uslovnu odluku o oslobađanju od kazne, može se ukinuti uslovna odluka oslobađanja od kazne ako:

- a) ne saraduje u potpunosti, pravovremeno i kontinuirano;
- b) nije objavio sve povrede Zakona o konkurenciji o slučaju u koji je bio uključen;
- c) ne osigurava potpuno, istinito i iskreno sve dokaze i informacije koje posjeduje ili su pod njegovim nadzorom.

#### Član 12.

Ako na kraju postupka privredni subjekt, podnosilac prijave za oslobađanje od kazne ispuni sve uslove navedene u članu 3. ove Odluke Konkurencijsko vijeće će donijeti konačnu odluku o oslobađanju od kazne.

### IV UBLAŽAVANJE KAZNE

#### Član 13.

Privredni subjekt koji ne ispunjava uslove za oslobađanje od kazne iz Poglavlja I ove Odluke, može se prijaviti za ublažavanje kazne, koja bi se inače mogla izreći.

#### Član 14.

Da bi se prijava privrednog subjekta za ublažavanje kazne uzela u razmatranje, privredni subjekt mora:

- a) Konkurencijskom vijeću dostaviti informacije koje imaju dodatnu vrijednost u pogledu dokaza koje Konkurencijsko vijeće već posjeduje po karakteru ili detaljnosti dokaza; i
- b) prekinuti svoje dalje učestvovanje u kršenju za koje postoji sumnja najkasnije do trenutka kada dostavi dokaze, prema uslovima koje je postavilo Konkurencijsko vijeće;
- c) pojam dodana vrijednost u smislu tačka a) ovog člana se odnosi na detaljnost dokaza i/ili nivo do kojeg dostavljeni dokazi, po svojoj prirodi, jačaju mogućnost Konkurencijskog vijeća da dokaže postojanje zabranjenog sporazuma.

#### Član 15.

Konkurencijsko vijeće u svojoj konačnoj odluci, između ostalog, mora utvrditi:

- a) da li je dokaz dostavljen od strane privrednog subjekta predstavljao značajnu dodanu vrijednost u skladu sa članom 14. tačka a) ove Odluke, u vrijeme kada je dostavljen, značajno pomogao u utvrđivanju povrede Zakona o konkurenciji.

b) visinu ublažavanja kazne za privredni subjekt, mjerodavnu u odnosu na visinu kazne koja bi se inače mogla izreći na kraju postupka, i to:

- 1) za prvi privredni subjekt koji je ispunio uslove iz člana 14. ove Odluke ublažavanje kazne od 30% do 50% od iznosa kazne;
- 2) za drugi privredni subjekt koji je ispunio uslove iz člana 14. ove Odluke ublažavanje kazne od 20% do 30% od iznosa kazne.
- 3) Za svaki sljedeći privredni subjekt koji je ispunio uslove iz člana 14. ove Odluke ublažavanje kazne do 20% od iznosa kazne.

#### Član 16.

(1) Da bi se odredila visina ublažavanja kazne u svakom od tri slučaja definisana u članu 15. ove Odluke, Konkurencijsko vijeće će uzeti u obzir:

- a) vrijeme podnošenja dokaza i njihovu dodanu vrijednost; i
- b) nivo i kontinuitet saradnje privrednog subjekta u postupku i posebno nakon dostavljanja dokaza.

(2) Ukoliko privredni subjekt dostavi dokaze koji se odnose na činjenice koje su prethodno bile nepoznate Konkurencijskom vijeću, a koje imaju direktan uticaj na ozbiljnost i trajanje pretpostavljenog zabranjenog sporazuma, Konkurencijsko vijeće neće uzimati te elemente u obzir prilikom utvrđivanje bilo kakve kazne koju će izreći privrednom subjektu koji je dostavio takve dokaze.

### V PROCEDURA UBLAŽAVANJA KAZNE

#### Član 17.

Privredni subjekt će od Konkurencijskog vijeća dobiti potvrdu o prijemu dokaza sa navedenim datumom i vremenom predaje svih mjerodavnih dokaza.

#### Član 18.

Konkurencijsko vijeće neće uzeti u obzir dostavljene dokaze uz prijavu za ublažavanje kazne privrednog subjekta ukoliko već postoji izdata uslovna odluka o oslobađanju od kazne iz člana 8. ove Odluke, koja se odnosi na istu pretpostavljenu povredu Zakona o konkurenciji, ili prije nego Konkurencijsko vijeće donese odluku u vezi sa drugim neriješenim zahtjevom za uslovno oslobađanje od kazne u odnosu na istu pretpostavljenu povredu.

#### Član 19.

Ukoliko Konkurencijsko vijeće dođe do preliminarne zaključka da dostavljeni dokazi ispunjavaju uslove propisane u članu 14. stav (1) tačka a) ove Odluke, obavijestiće, u pisanom obliku, predmetni privredni subjekt o namjeri njegovog uključivanja u proceduru ublažavanja kazne kategorijom ublažavanja propisanom u članu 15. stav (1) tačka b) ove Odluke.

#### Član 20.

Konkurencijsko vijeće će utvrditi krajnju kategoriju ublažavanja propisanu u članu 15. stav(1) tačka b) za svakog privrednog subjekta podnosioca prijave, za ublažavanje kazne nakon završetka postupka, a prije donošenja konačnog rješenja iz člana 43. Zakona o konkurenciji.

### VI ZAVRŠNE ODREDBE

#### Član 21.

- (1) U konačnoj odluci o oslobađanju odnosno o ublažavanju od kazne Konkurencijskog vijeća, saradnja privrednog subjekta tokom postupka mora biti navedena, da bi se pojasnilo oslobađanje od kazne ili ublažavanje kazne tom privrednom subjektu.
- (2) Ovaj dio konačne odluke se ne objavljuje zbog kršenja Zakona o konkurenciji.

#### Član 22.

- (1) Svaka pisana izjava/informacija urađena na osnovu ove Odluke i dostavljena Konkurencijskom vijeću sačinjava sastavni dio spisa Konkurencijskog vijeća.
- (2) Izjave/informacije iz stava (1) ovoga člana ne otkrivaju se privrednim subjektima koji su pod istragom zbog kršenja Zakona o konkurenciji.

#### Član 23.

Odredbe ove Odluke se odnose i na odgovorna lica u privrednim subjektima iz člana 48. stav (2) Zakona o konkurenciji.

#### Član 24.

Danom stupanja na snagu ove Odluke prestaje važiti Odluka o proceduri oslobađanja odnosno ublažavanja od kazne (liniency policy) («Službeni glasnik BiH» br. 15/06).

#### Član 25.

Ova Odluka stupa na snagu u roku od 8 (osam) dana od dana objavljivanja u «Službenom glasniku Bosne i Hercegovine», a objaviće se i u službenim glasilima entiteta i Brčko Distrikta Bosne i Hercegovine.

K.V. broj : 01-01-50-183-I/10  
Sarajevo, 23.mart 2010. godine

Predsjednik  
Konkurencijskog vijeća  
  
dr. Stjepo Pranjić